

Buletin

e-ISSN: 2600-8289

Rabi'ulakhir - Jamadilawal 1444/ November 2022

ACIS



FADHILAT BERSEDEKAH SECARA RAHSIA

**Kesan Melupakan Semangat
Nasionalisme dalam Kalangan
Rakyat Malaysia** 5

**Adat Perayaan dalam Masyarakat
Melayu di Malaysia** 6

**Kolaborasi ACIS dan UMHRC
memperkasakan PDPH UiTM
Cawangan Negeri Sembilan
Kampus Kuala Pilah** 8

eISSN 2600-8289



Fadhilat Bersedekah Secara Rahsia



Oleh:

Dr. Mohd. Kamel bin Mat Salleh

Pensyarah Kanan Akademi Pengajian Islam
Kontemporari (ACIS), UiTM Cawangan
Negeri Sembilan, Kampus Seremban



Sedekah ialah suatu pemberian yang diberikan oleh seorang Muslim kepada orang lain secara spontan dan sukarela tanpa dibatasi oleh waktu dan jumlah tertentu iaitu pemberian yang diberikan oleh seseorang sebagai kebajikan yang mengharap keredhaan Allah SWT dan pahala semata. Hukumnya adalah sunat dan amat digalakkan perlaksanaannya terutama bagi membantu mereka yang sangat memerlukan.

Manakala menurut para fuqaha' sedekah diertikan dengan zakat harta yang dikeluarkan kepada golongan fakir miskin dan sebagainya yang termasuk dalam golongan-golongan yang layak menerimanya menurut asnaf yang telah ditetapkan. Sedekah dalam erti kata ini hukumnya adalah wajib.

Dalam Al-Quran banyak sekali ayat yang menganjurkan kaum muslimin untuk sentiasa memberikan sedekah. Firman Allah S.W.T yang bermaksud *"Kamu tidak sekali-kali akan mendapat hakikat kebajikan (yang sempurna) sebelum kamu mendermakan sebahagian dari apa yang kamu sayangi"* (Ali Imran: 92). Dalam ayat yang lain, Allah S.W.T berfirman yang bermaksud *"Jika kamu zahirkan sedekah-sedekah itu (secara terang-terangan), maka yang demikian itu adalah baik (kerana menjadi contoh yang baik), dan kalau kamu sembunyikan sedekah-sedekah itu, serta kamu berikan kepada fakir miskin, maka itu adalah baik bagi kamu. Allah akan menghapuskan sebahagian daripada kesalahan-kesalahan kamu dan (ingatlah), Allah itu Maha Mengetahui secara mendalam akan apa yang kamu lakukan"* (Surah al-Baqarah: 271).

Bersedekah adalah amalan yang mendatangkan pahala terutama kepada mereka yang ikhlas melakukannya tanpa mengharap balasan atau pujian manusia sekeliling. Ini dibuktikan melalui firmanNya yang bermaksud *"Tidak ada kebaikan pada kebanyakan bisikan-bisikan mereka, kecuali bisikan-bisikan daripada orang yang menyuruh (manusia) memberi sedekah, atau berbuat makruf, atau mendamaikan di antara manusia. Barangsiapa yang berbuat demikian kerana mencari keredhaan Allah, maka kelak Kami akan memberikan kepadanya pahala yang besar."* (al-Nisa': 114).

Mereka yang bersedekah sentiasa mendapat pujian makhluk di langit lantaran kemuliaan amalan tersebut. Rasulullah S.A.W bersabda, maksudnya *"Tiada satu hari pun di mana pagi harinya seorang hamba ada padanya kecuali dua malaikat turun kepadanya, satu antara kedua-duanya*

berkata: 'Ya Allah, berikanlah ganti bagi orang yang berinfak (bersedekah membelanjakan hartanya), dan berkatalah satu lagi malaikat: wahai Tuhanku, berilah kerosakan harta kepada yang tidak mahu menafkahnnya" (Riwayat Bukhari dan Muslim).

Orang yang meninggalkan harta di dunia dalam bentuk wakaf akan menjadi pahala yang berpanjangan walaupun selepas kematian. Ini adalah berdasarkan kepada hadith Rasulullah S.A.W. daripada Abu Hurairah yang bermaksud *"Apabila mati seseorang insan, maka akan terputuslah segala amalannya kecuali tiga perkara iaitu sedekah jariah, ilmu yang dimanfaatkan daripadanya dan doa daripada anaknya yang soleh"*

sedekah dalam hadith ini membawa maksud wakaf.

Menurut hadith di atas, Nabi S.A.W. menyatakan bahawa walaupun seseorang itu telah meninggal dunia, masih ada peluang untuknya membuat pahala berpanjangan dan berterusan di alam barzakh iaitu melalui amalannya sewaktu di dunia salah satunya ialah melalui sedekah jariah. Maknanya, pahala akan tetap bertambah dan bersambung-sambung walaupun ketika itu seseorang berada di alam kubur dan tidak mampu beramal lagi. Ia ibarat seperti air sungai yang mengalir dari gunung tetap bertali arus tanpa henti.

Maka apabila seseorang itu bersedekah dengan ikhlas sewaktu masih hidup, pahala tersebut akan terus diperolehi walaupun setelah meninggal dunia. Contohnya seperti bersedekah atau mengeluarkan wang untuk pembinaan masjid, surau, madrasah, membina parit, telaga atau tali air untuk kegunaan orang ramai, menanam pokok buah-buahan lalu disedekahkan kepada makhluk Allah yang lain seperti manusia mahupun haiwan.

Termasuk juga dalam amalan sedekah ialah mewakafkan mashaf al-Quran atau surah Yasin di surau atau masjid untuk kegunaan orang ramai. Jika semua amalan tersebut diniatkan sedekah maka ia dinilai sebagai amalan jariah yang amat bernilai dan berharga yang boleh menjadi penyambung pahalanya di alam barzakh.

Amalan bersedekah dan berwakaf ini adalah merupakan satu keajaiban. Maksud ajaib di sini ialah mengeluarkan

sesuatu belanja, secara fizikal nampak berkurangan, tetapi secara tersirat dan maknawi, ia adalah merupakan satu pertambahan dalam bentuk pahala, pulangan dan keberkatannya.

Dalam ilmu matematik, sekiranya dibuat satu soalan, sebagai contohnya $10 - 2$ jawapannya ialah 8, tetapi dari sudut sedekah, jawapannya tidak akan menjadi 8. Boleh jadi jawapannya 18, 100, 1000 malah mungkin 1 juta. Inilah yang unik dan ajaibnya sedekah yang tidak akan dapat diterima akal melainkan apabila disertakan keyakinan bahawa itulah hakikat yang sebenar.

Perhatikan bersama ayat al-Quran di bawah agar menjadi inspirasi kepada semua umat Islam untuk terus membelanjakan harta di jalan yang sangat mulia dengan amalan bersedekah, kerana tiada apa yang dikurangkan oleh Allah, malah lebih ditambah-tambah dalam bentuk yang di luar jangkauan pemikiran manusia.

Firman Allah S.W.T yang bermaksud *"Allah susutkan (kebaikan harta yang dijalankan dengan mengambil) riba, dan Ia pula mengembangkan (berkat harta yang dikeluarkan) sedekah-sedekah dan zakatnya. Dan Allah tidak suka kepada tiap-tiap orang yang kekal terus dalam kekufuran dan selalu membuat dosa"* (al-Baqarah: 276).



Berdasarkan kepada beberapa kelebihan dan ganjaran sedekah seperti yang telah dinyatakan sebelum ini, bersandarkan dalil al-Quran dan al-Hadith, ternyata bahawa lebih banyak sedekah itu dikeluarkan maka lebih banyak pahalanya. Justeru apabila amalan bersedekah ini menjadi satu rutin biasa dan kerap kali dilakukan tanpa dikira atau dicatat, maka sudah pasti segala apa yang pernah disumbangkan itu tidak begitu diingati oleh si pemberi sedekah.

Begitu juga sedekah yang diberikan itu dibuat secara sembunyi tanpa pengetahuan orang lain sehingga ia sendiri tidak mengingati apa, di mana dan berapa banyak yang telah disedekahkan. Biasanya perbuatan yang diuar-uarkan

kepada orang ramai atau dibuat secara terang-terangan adalah lebih senang diingati berbanding yang dilakukan secara rahsia, lama kelamaan pasti akan terluput daripada ingatan. Ia lebih dekat dengan ikhlas yang pastinya adalah jiwa kepada setiap amal perbuatan seseorang hamba.

Inilah maksud sedekah yang diberikan oleh tangan kanan, tidak diketahui oleh tangan kiri. Dalam ayat al-Quran surah al-Baqarah ayat 271 seperti yang pernah dinyatakan sebelum ini menjelaskan tentang kemuliaan sifat berahsia dalam bersedekah.

Bersedekah secara terang-terangan itu tidaklah secara mutlaknya dilarang kerana dalam beberapa keadaan beramal secara nampak itu ada kalanya baik dan terpuji. Imam al-Ghazali dalam kitabnya Ihya' Ulumuddin ada menjelaskan kebaikan kedua-dua bentuk pemberian ini.

Antara kebaikan bersedekah secara tersembunyi tanpa pengetahuan orang lain ialah:

1. Dapat menyelamatkan hati dan lisan orang daripada memperkatakan tentang pemberian orang yang bersedekah itu. Apabila orang lain tidak mengetahui pemberian dari si pemberi, tiadalah berlakunya umpatan, hasad dengki, buruk sangka dan sebagainya. Jika perbuatan itu dalam penglihatan dan pengetahuan orang, kemungkinan berlaku cakap-cakap daripada orang yang melihat yang bukan sahaja memuji malah ada juga yang mengeji. Mungkin ada yang mempersoalkan, dari mana sumber sedekah itu, apa tujuan ia diberi, adakah untuk menunjuk-nunjuk atau berlagak baik dan sebagainya. Seperti ungkapan seorang ahli tasawuf Abu Ayub al-Sakhatyani *"Sesungguhnya aku meninggalkan amalan memakai pakaian-pakaian baru kerana bimbang kata-kata hasad dengki daripada jiran-jiranku"*.
2. Menzahirkan pemberian adalah satu celaan bagi seorang mukmin kerana ia tidak dapat menghalang perasaan bangga diri pemberi sedekah itu, sedangkan orang mukmin itu amat dilarang membangga diri dalam beramal.

Manakala antara kebaikan bersedekah secara terang-terangan adalah seperti berikut:

1. Ia sebagai tanda menzahirkan keikhlasan dan sifat baik pemberi sedekah itu.
2. Pemberian itu sewajarnya menjadi contoh kepada orang lain untuk turut sama melakukannya.
3. Sebagai lambang atau tanda mensyukuri segala nikmat pemberian Allah melalui pemberian kepada orang lain. Firman Allah S.W.T yang bermaksud *"Dan terhadap nikmat Tuhan-mu maka hendaklah kamu menyebut-nyebutnya (dengan bersyukur)"* (Surah al-Dhuha: 11).